

4581

Univerzitet u Sarajevu



University of Sarajevo

Broj: 0101-10921-2/21  
Sarajevo, 02. 11. 2020. godine

**Bosna i Hercegovina**  
**Federacija Bosne i Hercegovine**  
**KANTON SARAJEVO**  
**Skupština Kantona Sarajevo**  
**N/r: gosp. Elvedin Okerić**  
**71 000 SARAJEVO**

UNIVERZITET U SARAJEVU  
KANTON SARAJEVO

Broj	01	04	38989	35-27
Broj	9.11.2021			
Broj	38989			
Broj	35-27			

**Predmet:** Odgovor na zastupničku inicijativu zastupnice Amre Hasagić, *dostavlja se*

*Veza vaš akt broj: 01-04-38989-35/21 od 26. 10. 2021. godine*

Poštovani gospodine Okerić,

U vezi sa inicijativom uvažene zastupnice Hasagić obavještavamo vas o sljedećem:

Univerzitet u Sarajevu je na sjednici Senata održanoj 29.09.2021. godine razmotrio zastupničku inicijativu zastupnice Amre Hasagić u kojoj se od Univerziteta u Sarajevu traži izmjena Akademskog kalendara Univerziteta u Sarajevu na način da se akomodiraju slobodnim danima svi veliki vjerski praznici u trajanju od dva radna dana za svaki veliki vjerski praznik, što u načelu podrazumijeva obustavu nastave za svaki od 9 velikih vjerskih praznika koje obilježavaju vjernici islamske, pravoslavne, rimokatoličke, grkokatoličke, jevrejske, romske zajednice, te katolike pripadnike istočnih autonomnih crkava, pripadnika hrišćanske adventističke crkve sedmoga dana, pripadnika protestantskih crkava (evangelisti, reformirani, baptisti, metodisti, pentekostalci), odnosno poimence: Ramazanski Bajram, Kurban Bajram, Rimokatolički Božić, Rimokatolički Uskrs, Pravoslavni Božić, Pravoslavni Uskrs, Hanuka, Pesah, Ederlezi.

Na sjednici od 29.09.2021. godine Senat je donio Zaključak broj 01-14-199/21 kojim se konstatuje da će se korekcije u Akademskom kalendaru realizirati dokle je to moguće u skladu sa dosadašnjim preporukama Senata Univerziteta u Sarajevu kada su u pitanju obilježavanja vjerskih praznika.

Univerzitet u Sarajevu izražava uvjerenje da je poštivanje vjerskih prava civilizacijska stvar kojoj ne smije biti uskraćeno obitavanje u multikulturnoj i interkulturnoj sredini kao što je Univerzitet u Sarajevu. No, kako ne bismo došli u situaciju kršenja zakona koji trenutno propisuju broj i vrstu slobodnih dana za vjerske praznike (Zakon o radu Federacije Bosne i Hercegovine), kao i dinamiku izvođenja nastave sa pripadajućim rokovima za izvršenje nastavnih i ispitnih obaveza (Zakon o visokom obrazovanju), navedena inicijativa zahtijeva uključivanje svih ministarstava kojih se ova izmjena tiče, kao i izmjene zakonskih odredbi koji tretiraju nastavu na visokoškolskim ustanovama, državne praznike, kao i Zakon o radu Federacije BiH

Naime, Zakonom o praznicima ("Službeni list R BiH", broj 2/92 i 13/94) koji je preuzet i koji se u skladu sa Ustavom Federacije BiH primjenjuje kao federalni zakon, određeno je da su međunarodni praznici koji se slave u Federaciji Bosni i Hercegovini Nova Godina, Prvi svibanj / maj i Dan pobjede nad fašizmom. Prema Zakonu Nova godina se slavi 1. i 2. siječanj / januar. Prvi svibanj / maj – Praznik rada se slavi 1. i 2. svibanj / maj. Ako jedan od dana u koje se slavi Nova Godina i Prvi maj padaju u nedjelju, praznikom se smatra prvi naredni dan poslije ta dva dana. Deveti svibanj / maj – Dan pobjede nad fašizmom se proslavlja radno. Zakonom o proglašenju 1. ožujka / marta Danom nezavisnosti Bosne i Hercegovine ("Službeni list R BiH", broj 9/95), određeno je da je 1. ožujak /mart Dan nezavisnosti Bosne i Hercegovine praznik i na taj dan državni organi, poduzeća i druga pravna lica ne rade. Zakonom o proglašenju 25. studenog / novembra Danom državnosti Bosne i Hercegovine ("Službeni list R BiH", broj 9/95), određeno je da je 25. studeni / novembar Dan državnosti Bosne i Hercegovine i da na taj dan državni organi, poduzeća i druga pravna lica ne rade. U smislu gore iznesenog, Dan nezavisnosti Bosne i Hercegovine – 1. ožujak / mart i dan državnosti Bosne i Hercegovine – 25. studeni / novembar, se slave samo jedan dan i to na dan samog praznika.

Pored praznika koji se u Federaciji Bosne i Hercegovine proslavljaju kao državni praznici, Zakonom o radu ("Službene novine Federacije BiH" 26/2016) utvrđeno je pravo zaposlenika da odsustvuje sa posla četiri radna dana tijekom jedne kalendarske godine radi zadovoljavanja njegovih vjerskih odnosno tradicijskih potreba, s tim da se odsustvo od dva dana koristi uz naknadu plaće – kao plaćeno odsustvo, a dva dana kao neplaćeno odsustvo.

U skladu sa članom 57. Zakona o visokom obrazovanja nastava se organizira u dva semestra, ljetni i zimski, a nastava u svakom traje 15 sedmica *kontinuiranih* aktivnosti, odnosno 75 radnih dana u semestru, odnosno 150 radnih dana na nivou studijske godine, što ne uključuje periode ispita. U akademskoj 2021/2022. godini broj dana kada se ne bi održavala nastava bi prema zastupničkoj inicijativi bio sljedeći:

- Početak Hanuke – 1 dan (17.12.2021.)
- Božić – 2 dana (24.12. Badnje večer i 27.12.2021.)
- Božić – 2 dana (06.01. Badnje večer i 07.01.2022.)
- Početak Pesaha -1 dan 15.04.2022.
- Uskrs – 2 dana 18. i 19.04. 2022.
- Vaskrs – 2 dana 25 i 26.04. 2022.
- Bajram – 2 dana 03 i 04.05. 2022.
- Erdelezi (Romski praznik) – 1 dan 06.05.2022. godine
- Bajram, 2 dana 08 i 09. 07.2022.

Uzimajući u obzir gore navedenu dispoziciju u studijskoj 2021/2022. godini u zimskom semestru bilo bi 5 neradnih dana, a u ljetnom semestru bi bilo 9 neradnih dana, ukupno 14 dana. U akademskoj 2021/2022.godini broj potencijalno neradnih dana je manji jer neki praznici padaju u dane vikenda. No u narednoj studijskoj godini praznici padaju u radne dane, te je tada potrebno imati 18 neradnih dana na nivou studijske godine, što po zakonom propisanoj dinamici održavanja nastave, ispita i raspusta nije trenutno moguće izvesti sa potpunim zatvaranjem Univerziteta u Sarajevu u tražene dane.

Univerzitet u Sarajevu podržava pravo studenata, nastavnika i saradnika Univerziteta u Sarajevu na vjerske slobode i obilježavanje vjerskih i tradicijskih praznika, ali zbog gore prezentiranih argumenata Univerzitet u Sarajevu trenutno ostaje pri svojim ranijim

preporukama kada je obilježavanje vjerskih praznika u pitanju, da se neradni dani odnose na one koji obilježavaju blagdane i to na način utvrđen Akademskim kalendarom, sa preporukom za postupanje u nastavne i ispitne dane.

Ukoliko uvaženi zastupnici smatraju da je potrebno izvršiti izmjene Akademskog kalendara radi akomodacije vjerskih praznika, molimo resorno ministarstvo da u suradnji sa drugim ministarstvima donese odgovarajuće rješenje, kako ne bismo došli u situaciju kršenja važećih propisa.

S poštovanjem,

*R*REKTOR

Prof. dr. Rifat Skrijelj



**Akt sačinio:**

Nina Dragičević  
rukovoditeljica Službe za nastavu

**Akt kontrolisao:**

prof. dr. Dženana Husremović  
prorektorica za nastavu i studentska pitanja

Sa sadržajem akta saglasan i usklađenost sa čl.126  
Zakona o visokom školstvu (Službene novine  
KS“, broj: 33/17, 3: i 39/21) potvrdio:

Generalni sekretar, *R*ezan Rimpović, dipl.iur.

Dostaviti:

- Naslovu
- Službi za nastavu
- a/a